

Dame prudence apres ce quelle eut oy debonnairement et en grāt paciencie toutes les choses que melibee son mary veult auāt traire si demanda licēce de parler et puis dist. Sire dist elle a la premiere rayson que vous maues deuant mise et proposee peult on respondre legierement car ie dy que nest pas folie de changier son conseil quant la chose se change ou quant la chose est plus forte et plus diuerse que par auant nestoit. Apres ie dy encozes plus car se tu auoyes promis et iure de faire quelque mauuaise empri se et tu la laissoies de faire pour iuste cause lon ne deuroit pas dire q tu fusses mensongier ne pariur. Car il est escript. Le sage ne ment mie quāt il mue son propos en mieulx. Et iacoit ce que tempri se soit estable et ordonnee par grant multitude de gens pource ne la conuient pas acomplir. Car la verite des choses et le prouffit est mieulx trouuee par pou de gēs sages et parlans par rayson que par grant multitude de gens ou chascun brait et crie a sa volente et tel multitude nest point honeste. A la seconde rayson quant vous dites que toutes femmes sont mauuaises et ne sen trouue nefune bonne salue vostre reuerence. Vous les desprises ainsi toutes mais il est escript. Qui tout desprise a tous desplait. Et seneque dit. Nul ne desprises mais ce que tu sces tu le dois enseigner sans presumption et ce que tu ne sces tu ne dois pas auoir honte de le demander a moindze de toy. Et que moult de femmes soient bonnes lon le peult prouuer legieremēt. Premièrement car nostre seigneur ne fust oncques deignez descendre en femme se elles fussent toutes mauuaises ainsi comme tu le dis. Apres pour la bonte des femmes nostre seigneur Jesucrist quant il resuscita de mort a vie il sapparut premier a marie magdalene que aux apostres. Et quant salomon dit que de toutes il nen a trouue vne bonne pource ne sensuyt pas que nulle ne soit bone car iacoit ce quil ne lait trouue moult des autres en ont bien trouue plusieurs bonnes et loyaux. On par auenture quant salomon dit quil na point trouue de bonne femme il entent de la bonte souveraine de laq̄lle nul nest bon seulement fors que dieu selon ce q̄ il meisme le dit en leuangile. Car nulle creature nest tant bonne a qui ne faille aucune chose sans comparacion a la perfection de son createur. La tierce chose si est quāt tu dis que se tu te gouvernoies par mon conseil il sembleroit q tu me donnasses par dessus toy seignourie salue ta grace il nest pas ainsi car selon ce nul ne predroit conseil fors a celuy a qui il voudroit sur soy donner puissance et ce nest pas vray car celuy qui demande conseil a puissance et france liberte de faire ce